

# Pablo lelpox carta Filipos paklowaxpijiwliajwa

---

## Pablo lelpox carta Filipos paklowaxpijiwliajwa

**1** Xan Pablo, Timoteo sʉapich, nabistax Jesucristoliajwa. Lelx amprox carta xamal Filipos paklowaxpijwamliajwa. Dios pejjiwam, naexasitam xot Jesús pejwʉajan. Amprox carta-bej ancianosliajwa, diáconosliajwabej, japi xamalxotpi. **2** Xan kawʉajna x waj-ax Dios, wajpaklon Jesucristobej, japi xamal kajachawaesliajwa, chiekal duilaliajwambej, asex jiw sʉapich.

## Pablo Dios kawʉajanpox Jesús pejwʉajan naexasitiliajwa

**3-5** Nejchaxoelx wʉt xamalliajwa, Diosliajwa gracias-an, japon xamal kajachawaet xot. Xamalxotx wʉt, jelnaexasitam wʉt Jesús pejwʉajan, xamal xan nakajachawaetam, asex jiw naewʉajnalijwan chimiawʉajan, Jesús pejwʉajan. Amwʉtjelbej nakiowa nakajachawaesfulam. Samata, xan nejchachaemlax xamalliajwa, Dios kawʉajna x wʉt. **6** Xan chiekal matabijtax, Dios xamalxot tʉadut kajachawaesliajwa nejnejchaxoela-xan pachaemaliajwa, isfulaliajwam pachaempoxan. Dios japox isfulaxael, hasta Jesucristo pejme fuloek wʉt. **7** Puexa xan nejchaxoelxproxan xamalliajwa, xabich pachaem, xamal xabich nejxasinkax xot. Xan jiw jebatatax wʉt, jiw tato'alpi wʉajnalelan wʉtbej, jawʉt xan jum-an japi paklochow chiekal najumtaeliajwa: “Chimiawʉajan, Jesús pejwʉajan, diachwʉajnakolax jiw bu'weliajwas” —an, naewʉajna x wʉt. Xamal plata naxto'am xanliajwa nakajachawaesliajwam, jiw naewʉajna x wʉt Jesús pejwʉajan. Dios nabeltaen xot, nato'a Jesús pejwʉajan jiw naewʉajnalijwan. **8** Dios matabijt, xamal xabich taesianpox, xabich nejxasinkax xot. Me-ama Jesús xamal xabich nejxasink, xanbej, ja-an, xamal nejxasinkax wʉt.

**9** Xan Dios kawuajna xamal nakaewa kaes chiekal nanejxasinkaliajwam. Dios kawuajna xbej xamal japon kaes chiekal matabijaliajwam. **10** Xamal ja-am wut, matabijaxaelam isliajwam kaes pachaempoxan. Ja-am wut, chiekal duilaxaelam. Samata, asamatkoi Cristo pejme pask wut, xamal chiekal bu'wujanjilaxaelam. **11** Kaen Cristo xajup xamal kajachawaesliajwa isliajwam pachaempoxan. Ja-am wut, xamal chiekal duilaxaelam. Samata, asew jiw Dios sitaeyaxael.

**Pablo chiekal dukpox, Cristo pejuwajan naexasit xot**

**12** Takoew, xan nejxasinkax xamal chiekal matabijaliajwam jumchiyaxaelenpox. Jiw jebatat xan najia, potuajnu cha kaes asew jiw naewuajnasamatan chimiawuajan, Jesús pejuwajan. Pe nakiowa, xabich jiw kaes naexasisful Jesús pejuwajan, xan jiw jebatatax wut. **13** Puexa gobernador pejbapijiw, asew jiwbej, matabija jiw jebatat asew jiw xan najiapox, naewuajnafulax xot Cristo pejuwajan asew jiwliajwa. **14** Jesús pejuwajan naexasiti nawultaen wut asew jiw xan najiapox jiw jebatat, japi kaes Dios xanaboeja kajachawaesliajwas. Samata, pejlwla-eli naewuajnafulaliajwa Jesús pejuwajan asew jiwliajwa.

**15** Diachwuajnakolax asew jiw naewuajan Jesús pejuwajan, xan nanusasiowal xoti. Japi xabich kaes jiw naewuajan, nejxasink xoti jiw kaes sitaeliajwas. Me-ama xan jiw nasitaen wut, jachi-elasiapi. Japi jiw xabich kaes nejxasink jiw sitaeliajwas. Asew jiw lax naewuajan Jesús pejuwajan, japi nejxasink xot asew jiwbej Jesús pejuwajan chiekal naexasisliajwa. **16** Japilax naewuajan asew jiw Jesús pejuwajan, xan nanejxasink xot. Japi pajut chiekal matabija, Dios natapai jiw jebatat jiw najeliajwa, jaxotx wut paklochow jumchiliajwan: “Chimiawuajan, Jesús pejuwajan, diachwuajnakolax jiw bu'welijaesw” —chiliajwan paklochow. **17** Jiw, xan nanusasiowalpi Jesús pejuwajan naewuajnaprox, japi xabich kaes naewuajan jiw, xabich kaes sitaeliajwas. Samata, nakaewa najum-aechi: “Amwutjel Pablo jiw jebatat nakwultaen wut xabich xatis jiw naewuajnaprox Jesús pejuwajan, kaes xabich nejxaejwaxaeson” —na-aechi nakaewa. **18** Xan japoxliajwa nanejxaejwaxil, japi jiw xamal chiekal naewuajan wut Jesús pejuwajan. Puexa japi jiw naewuajanproxliajwa, xan nejchaemlax japoxliajwa.

Xan kaes nejchachaemlaxaelenbej. **19** Xamal pomatkoicha Dios kawuajnam xanliajwa. Espíritu Santo, Jesucristo to'aspon, xan nakajachawaet. Samata, matabijtax asamatkoi nakolsaxaelenpox amxot, jiw jebatat. **20** Xan tajlewt naewuajna-enil wut Jesús pejwuajan, ja-aech wut xan tadalaxael. Pe amwutjel, amxot, jiw jebatatax wut, nakiowa naewuajnafulax Jesús pejwuajan, Dios xanaboejsfulax xot. Asamatkoi, paklochow wuajnalelan wut, jumchiyaxaelen naewuajnafulaxpox. Jawut, naboesa wut, o, naboesa-el wutbej, japoxan koloeyaxan xanliajwa chiekal pachaemaxael. Xan nejxasinkax jiw sitaeliajwa Cristo. **21** Japox koloeyaxliajwa nejchaxoelxbej: “Laejax wutfuk, isfulaxaelen Cristo nejxasinkpoxan. Pe tux wutbej, Cristoxotaxoeyan. Tux wut, japox xanliajwa kaes pejme pachaem” —an, nejchaxoelx wut. **22** Laejax wutfuk, nabichaxaelen Jesucristoliajwa. Samata, chiekal matabijs-enil, achax kaes pejme pachaem xanliajwa, ampathatat laejax, o, tupaliajwanpox. **23** Japoxan, koloeyaxxot, tampoel chiekal matabijsliajwan, masox koloeyaxxot kaes pejme pachaem xanliajwa. Pachaem Cristoxotaliajwan, tux wut. Japox xanliajwa xabich kaes pejme pachaem. **24** Xan laejax wutfuk ampathatat, kaes pejme pachaem xamal kajachawaesliajwan. **25** Xan chiekal matabijtax. Laejax wutfuk, xamal chiekal kajachawaesfulax kaes Dios chiekal xanaboejalijwam, kaes chiekal nejchachaemlaliajwambej, Jesús pejwuajan naexasisfulam xot. **26** Asamatkoi, pejme xamalxotaxaelen wut, xamal jumchiyaxaelam Jesucristo jumtaeliajwa: “Gracias, Pablo pejme pat xot xanalxot” —chiyaxaelam xanliajwa.

**27** Xamal isfulde Jesucristo pejwuajanxot jum-aechpox! Jaxox ja-amsfulde, xan xamalxotx wut, o, xamalxota-enil wutbej! Xan jumtaesianbej xamal chiekal duilampox kaenejchaxoelaxtat, Jesús pejwuajan naexasitam xot. Jumtaesianbej, xamal asew jiw naewuajnampox Jesús pejwuajan, japi jiwbej naexasisliajwa japawuajan Dios bu'weliajwasbejpi. **28** Jesús pejwuajan naexasis-eli, is wut babijaxan xamalliajwa, nabej nejlewele! Ja-am wut, japi jiw pajut matabijaxael asamatkoi japi Dios kastikaxaesopox. Jawutbej pajut chiekal matabijaxaeli xamallax Dios bu'weyaxaelpox. Puexa japoxan jachiyaxael. **29** Dios tapaei xamal naexasisliajwam Jesús pejwuajan. Dios tapaeibej nabijasliajwam, naexasitam xot Jesús pejwuajan. **30** Xan nabijatax, asew jiw babijaxan is wut xanliajwa, naexasitx xot Jesús pejwuajan.

Xamalbej nabijatam japi jiw pijaxtat. Xamal nataenam, majt nabijatax wut. Amwutjel nakiowa nawultaenam nabijataxpoxfuk.

### **Puexa jiw chimiajamechan jumchiyaxaelpox Cristoliajwa**

**2** Jesús pejwujajan naexasitam xot, Dios xanaboejam. Xamal najut matabijambej Cristo xamal nejxasinkpox. Samata, xamal nejchaxoela-emil asaxan. Espíritu Santo xamal nejmatpuatanxotpon. Samata, chiekal pachaemam nakaewaliajwa. Nabeltaenambej nakaewa. **2** Samata, xamal isfulde xan to'axpox, xan nejchachaemlialijwan xamalliajwa! ¡Xamal nakaewa nanejxasinkde! ¡Xamal isaxaelampox isfulde kaanejchaxoelaxantat! **3** Xamal nejchaxoelam wut, ¡nabej nejchaxoele! ampox: “Xan isxpoxan, japoxan xan tajutliajwa” —nabej aeche! ¡Nabej nejchaxoele'bej: “Ampoxan isx jiw xabich nasitaeliajwa” —nabej aeche', nejchaxoelam wut! Xamal najutliajwa nejchaxoelam wut, ¡nejchaxoelde ampox: “Xan kaes pachaema-enil. Me-ama asew jiw, xabich pachaempi, xan jachienil” —amde, nejchaxoelam wut! **4** Xamal nejchaxoelam wut, ¡nabej nejchaxoele'bej isliajwam pachaempoxan xamal najutliajwakal! ¡Nejchaxoelde isliajwam pachaempoxan asew jiwliajwabej!

**5** Me-ama Jesucristo nejchaxoel, ¡jasox xamalbej nejchaxoelde!

**6** Jesucristo chiekal najup, pax Dios swapich. Pe japon jumbisnika-el, me-ama pax Dios wut, jachiliajwa.

**7** Samata, kofton tato'alpox Diosxotse fulaeliajwa ampathatasik. Ja-aech wut, naelton ampathatat. Japon chiekal ti't wut, me-ama nejmach-aton wut, ja-aechon.

**8** Ampathatat wuton, pajut nejxasinkpoxan is-el. Japonlax isful Dios nejxasinkpoxan. Samata, pajut natapaeipon asajiw boesaliajwas, Dios to'as xoton japox jachiliajwas. Jatis wut, japon tup cruztat. Me-ama xabich babijaxan ispon wut, jakitison, kimatamatlas wut cruztat.

**9** Jatis wuton, japon Dios mat-ech pejme dukaliajwa. Bw'fosbejpon athu poxase, kaes paklon nadofaliajwa, puexa tato'laliajwabejpon. Kaes asan ajil, me-ama japon, jason.

**10** Dios jasox to'a Jesús, puexa jiw brixtat nuilaliajwa Jesús pejwujajnael, puexa athuxotsepi, ampathatpijiwbej, infiernoxotpijej.

**11** Puexa jiw jumchiyaxael Jesúsliajwa: “Japon paklon puexa jiwliajwa” —chiyaxaespon. Ja-aech wut, puexa jiw pajut matabijaxael Dios diachwujajnakolax xabich pachaem.

**Jesús pejwɔajan naexasiti ampathatat,  
me-ama itliak wɔt, ja-aechi**

**12** Takoew, xamal nejxasinkaxpim, majt xamalxotx wɔt, xamal xan nanaexasitam. Amwɔtjel, atuajan wɔt, ꞑkaes pejme nanaexasisfɔlde! Kaenanɔla xamal chiekal duilam, Dios xabich sitaenam xot, naexasitam xotbej Jesús pejwɔajan. **13** Dios xamal kajachawaesfɔl xot, nejxasinkam isliajwam Dios nejxasinkpoxan. Dios nejxasinkpoxan isaxaelam wɔt, japon kajachawaesfɔlaxaelbej xamal japoxan isliajwam.

**14** Kiwesla wɔt asax isliajwam, ꞑnakiowa isde! ꞑNabej jum-aeche' babejjamechan japoxliajwa! ꞑNakaewa nabej nalosbej! **15** Ja-am wɔt, asew jiw babejjamechan jumchiyaxil xamalliajwa. Dios paxim xot, ꞑchiekal duilafɔlde jiw babejchowxot! Ja-am wɔt, xamal, me-ama ithaej, madoi itliak wɔt, jachiyaxaelam japi jiwliajwa. **16** ꞑJiw babejchowxot naewɔajande Jesús pejwɔajan japi jiw chiekal matabijaliajwa, chiekal duilaliajwabejpi pajelnejchaxoelaxantat! Ja-amfɔlam wɔt, Cristo fɔloek wɔt, xan nejchachaemlaxaelen xamalliajwa. Matabijtax xan nawenafo'axilpox, xamal naewɔajnaxpox. **17** Dios nejchachaemil, xamal naexasitam xot Cristo pejwɔajan. Xan matabijtax wɔt Dios nejchachaemilpox xamalliajwa, xanbej nejchachaemlax. Xan bej nabɔ'aboesaxaelbej asew jiw, xamal naewɔajnax xot Jesucristo pejwɔajan. Japi nabɔ'aboesa wɔt, xan nejchachaemlaxaelen Diosxotse. **18** ꞑXamalbej xanliajwa nabej nejxaejwe'! ꞑAsbuan jumch nejchachaemilde!

**Pablo nejchaxoelpox to'aliajwa Timoteo,  
Epafrodito suapich, Filipos paklowax poxade**

**19** Wajpaklon Jesús nejxasink wɔt, kamtalejen xan to'axaelen Timoteo xamal poxade. Timoteo xamalxot nawia'an wɔt, wɔltaeyaxaelen, ma-am xamal, duilam wɔt. Wɔltaenx wɔt chiekal duilampox, xan xabich nejchachaemlaxaelen. **20** Kaen Timoteo kaenejchaxoelax, xan suapich. Xanxot kaes asan aton ajil, xamalliajwa xabich nejchaxoelpon, me-ama xan, ja-aechpon. **21** Puexa amxotpijiw nejchaxoel pajut isasiapoxan. Samata, nejchaxoela-eli isliajwa Jesucristo pejbichax. **22** Xamal chiekal matabijam, Timoteo chiekal nabist Jesúsliajwa. Japon asew jiw naewɔajan Jesús pejwɔajan, xan suapich. Samata,

Timoteo xanliajwa, me-ama taxulan wut, jabuan-anpon, nakajachawaesful xot naewuajnaproxan. **23** Xan tajut chiekal matabijtax wut jachiyaxaelprox xanliajwa amxot jiw jebatat, jawut to'axaelen Timoteo xamal poxade. **24** Dios nejxasink wut, xanbej tajut fulaeyaxaelen xamal taeliajwan.

**25** Timoteo fulaeyaxil wutfuk, xan nejchaxoelx matxoela to'aliajwan wajkoewan Epafrodito xamal poxade. Epafrodito nakajachawaet xan jiw naewuajnaprox wut Jesús pejwuajan. Xamal japon to'am wut, japon fulaen xanel nakajachawaesliajwa nawewe'pproxan. **26** Epafrodito majt xabich bu'xaenk, xanxot wut. Amwutjel chiekal nejchaemlison. Samata, japon xamal xabich taesia. Xabich nejchaxoelon xamalliajwa, xamal xabich nejchaxoelam xot japonliajwa, wultaenam wut japon majt xabich bu'xaenkprox. **27** Epafrodito bu'xaenk wut, diachwuajnakolax mox pejtupapon. Dios beltaens xot, kachawechpon boejthulaliajwas japawaxae. Pe japonkal Dios beltae-esal. Xanbej Dios nabeltaen, Epafrodito tup wut xabich kaes nanejxaejwasamata. **28** Samata, Epafrodito to'axaelen xamal poxade. Pejme xamal japon taeyaxaelam wut, xabich nejchachaemlaxaelam japonliajwa. Xanbej nejchachaemlaxaelen, xamal pejme japon taeyaxaelam wut, chiekal nejchaemxotlison. **29** Epafrodito xamalxot pat wut, xamal chiekal bu'kulim, nejchachaemlaxtat, japonbej naexasit xot Jesús pejwuajan! ¡Chiekal sitaembejpon! ¡Asew jiw, Jesús pejwuajan naexasiti, japibej sitaem! Me-ama Epafrodito sitaenam wut, jiamdebej japi jiwliajwa! **30** Epafrodito xan nakajachawaet wut Cristo pejbichax, japon waxae waech wut, mox pejtupepon. Xamal japon to'am xan nakajachawaesliajwa, xamal najut nakajachawaesaximil xot.

### **Kaes pejme pachaempox, japox wajpaklon Jesucristo matabijasprox**

**3** Takoew, jamwutjel xamal nejchachaemilde, naexasitam xot Jesús pejwuajan! Chaemila-el xan pejme lelaliajwan chajia lelprox xamalliajwa. Ampox, lelprox, xabich pachaem xamal najut chiekal natataeflaliajwam, asew jiw xamal naekichachajbasamata. **2** ¡Chiekal taem jiw babejchowliajwa! Japi naewuajan wut, jum-aechi: “Judíos-elpi, naexasiti Jesús pejwuajan, japi circuncidaxaes Dios pejmarkaxliajwa Dios bu'welijaesw”

—aechi, jiw naewuajan wut. **3** Diachwuajnakolax xatis Dios pejiws. Espiritu Santo nakkajachawaet xot, xatis jumtis Diosliajwa: “Xam xabich pachaemam” —tis. Xatis chiekal nejchachaemlas, Jesucristo pejiws xot. Matabijas Dios nakbu'weyaxilpox wajut isaspoxantat. Dios nakbu'weyaxael, Jesucristo nakwemot xot babijaxan isaspoxanliajwa. **4** Kaen judiosxot pajut pijaxtat weyaxael wut babijaxan ispoxanliajwa, xanlap japonaxaelen. **5** Xan nalaeltaxpox ocho matkoiyen wut, nacircuncida. Xan israelita-atonan. Benjamín pamonanbej. Tadjame hebreojame. Xan fariseo-atonan. Samata, me-ama fariseos chiekal naexasit Moisés chajia lelpox, xanbej ja-an, chiekal naexasitx wut Moisés chajia lelpox. **6** Xan majt xabich kaes naexasitx Moisés chajia lelpox. Samata, chakifolx naexasiti Jesús pejwuajan jaelialajwan, japi jiw jelialjwan jiw jebatat. Samata, kaen najumchiyaxil xanliajwa natasalaliajwa: “Pablo chiekal naexasis-el Moisés chajia lelpox” —nachiyaxil. **7** Chiekal majt matabijs-enil wut, xan nejchaxoelx: “Diosliajwa isxpoxan xabich pachaem” —an, majt nejchaxoelx wut. Pe amwutjel, Jesús pejwuajan naexasitx xot, chiekal matabijtax, majt isxpoxan Diosliajwa japoxan pachaema-el. **8** Amwutjel chiekal matabijtax. Kaes pejme pachaem tajpaklon Jesucristo matabijtaxpox. Samata, majt puexa isxpoxan, puexa japoxan chiekal koftax kaes matabijsliajwan Jesucristo. **9** Xan amwutjel naexasitx Cristo pejwuajan Dios nabu'welialjwa. Samata, kaes nejchaxoela-enil: “Moisés chajia lelpox xan naexasisaxaelen Dios nabu'welialjwa” —chi-enil, nejchaxoelx wut. Cristo tuppox cruztat xanliajwa, japox naexasitx xot, Diosliajwa bu'wuajanjinil. **10** Xan kaes chiekal matabijsasian Jesucristo. Japon tup wut, Dios mat-echpon pejme dukaliajwa. Xanbej chiekal dukasian Dios pejkajachawaesaxtat. Me-ama Jesucristo nabijat xanliajwa, xanbej jachisian. Aton tup wut, kaes babijaxan is-el. Xanbej japoxasian. Laejax wut, chiekal laejasian babijaxan is-elaxtat. **11** Xan nejxasinkax xanbej Dios namat-esliajwa pejme dukaliajwan, asamatkoi Dios tupi mat-eyaxael wut pejme duilaliajwa.

### **Chiekal laelpaxaespox xatis kanaliajwas premio**

**12** Xan tajut jumchi-enil asew jiwliajwa: “Xan chiekal isx puexa Dios nejxasinkpoxan” —chi-enil asew jiwliajwa. Nawewe'p chiekal nejchaxoelaliajwan, me-ama Dios nejxasink. Dios nakkajachawaet wut, isaxaelen Dios nejxasinkpoxan. Me-ama Cristo

nejchaxoel, xanbej jachiyaxaelen, namakafit xot Cristo pamaknanliajwa. **13** Takoew, xan matabijtax puexa chiekal is-enilpox Cristo nejxasinkpoxan. Pe nakiowa, majt isxpxoxan, amwütjel kaes japoxan is-enil. Amwütjellax isfulaxaelen Cristo nejxasinkpoxan. **14** Aton xabich najaet pasliajwa markasxot premio kanaliajwa. Xanbej chiekal dukasian, Dios namakafit xot chiekal dukaliajwan, xan naexasitx xot Jesús pejwüajan.

**15** Jasox puexa xatis chiekal nejchaxoelaxaes, Dios piach naexasich xot. Xamal japox nejchaxoela-emil wüt, Dios kaja-chawaesaxael chiekal nejchaxoelaliajwam. **16** Xatis matabijas isliajwas Dios nejxasinkpoxan. Samata, japoxan isfulaxaes.

**17** Takoew, ¡xamal chiekal duilde! Me-ama xan chiekal dukx wüt, ¡ja-amde! Jiw chiekal duilpi, me-ama xanal, ja-aechpi, ¡japi jiw xamal chiekal taem! ¡Ja-amde xamal chiekal duilaliajwam, me-ama japi jiw! **18** Pin-iaveces xamal jüm-an. Amwütjel, pejme jüm-an wüt, jüm-an itminxpoxtat, xabich jiw naexasis-el xot Jesucristo tuppox cruztat. Japi jiw nejxasinka-el Jesús pejwüajan. **19** Ampathat toep wüt, japi jiw Dios toesaxaes, babijaxan pajut isasiapoxan is xoti. Japi jiw bұxdala-el chapaeliajwapi asew jiw babijaxan ispoxanliajwa. Japi nejchaxoel wüt, nejchaxoel ampathatpijaxankal. **20** Xatislax duilaxaes Diosxotse. Samata, wüaj nawesfulas wajpaklon Jesucristo pasliajwasik nakbұ'weliajwa. **21** Wajpaklon Jesucristo pask wüt, wajbұ'an, ampathatpijax, nakwexaliaxaxaelon, chiekal pachaema-el xotox. Do jawüt, wajbұ'an asabұ'anaxael. Pajelbұ'anaxaes. Jawüt xatis wajbұ'an, me-ama wajpaklon Jesucristo pejbұ't wüt, jachiyaxael. Do ja-aech wüt, japon puexa tato'laxael.

### **Pomatkoicha nejchachaemlaxaelpox naexasiti Jesús pejwüajan**

**4** Takoew, xamal nejxasinkaxpim, xabich taesian xamal. Xabich nejchachaemlaxbej xamalliajwa, chiekal naexasitam xot Jesús pejwüajan. Samata, asew jiw japox chapaeix xamal chiekal naexasitam pox Jesús pejwüajan. ¡Chiekal xanaboejim wajpaklon Jesucristo!

**2** Xan ampox jüm-an japow Evodialiajwa, asaow Síntique-liajwabej, japi watho' chiekal kaenejchaxoelaxliajwa, nakaewaliajwa, naexasit xoti wajpaklon Jesucristo pejwüajan. **3** Xam, tajnachalnam, kaeyax nabistas xot Diosliajwa. Xan



jum-an xam kajachawaesliajwam, japi watho' pejme chiekal kaenejchaxoelaxliajwa. Japi watho' xabich xan nakajachawaet, xamalxot naewuajna x wut Jesús pejuwan. Jawut japon Clementebei, kaes asex jiw suapich, xabich nakajachawaet, xamalxot naewuajna x wut. Japi jiw wullels Dios pejfatat, pomatkoicha duilaliajwapi Diosxotse.

**4** ¡Pomatkoicha xamal nejhachaemilde, wajpaklon pejiwam xot! Pejme jum-an xamal nejhachaemlaliajwam. **5** ¡Chiekal duilde asex jiw pajut matabijaliajwa, xamal pachaemampim! ¡Nabej nejkiowe'bei wajpaklon Jesucristo mox pawuajnapox pasliajwa ampathatasik!

**6** ¡Xamal xabich nabej nejhaxoele' asaxliajwa! Asax pachaema-elpox wut xamalliajwa, ¡Dios kawuajande japox chiekal pachaemaliajwa! Dios kawuajnam wut, ¡nabej nejkiowe'bei Dios graciaschiliajwam puexa xamal kajachawaetpoxliajwa! **7** Ja-am wut, Dios xamal kajachawaesaxael xabich nejhaxoelasamatam nejhaxoelampox. Nejhachaemlaxaelambej. Japox nejhachaemlax, Dios pijax. Samata, asex jiw matabijaxil japanejhachaemlax. Xamal nejhachaemlam wut, nejlewlaxil. Nejhaxoelam wut, chiekal nejhaxoelaxaelambej, xamal Jesucristo pejiwam xot.

### **Pablo to'apox Filipos paklowaxpijiw nejhaxoelaliajwa puexa pachaempoxan**

**8** Takoew, xamal jumchiyaxaelen matdukanaewuajna x. Nejhaxoelam wut, ¡nejhaxoelde puexa diachwuajnakolaxpoxan, puexa jiw sitaenpoxanbei! ¡Nejhaxoeldebei puexa pachaempoxan, Dios nejxasinkpoxan! ¡Nejhaxoeldebei isliajwam jiw jum-aechpoxan: “Ampoxan xabich pachaem xatis isliajwas” —aechpoxan!

**9** ¡Xamal chajia naewuajna xrox, chanaekabuana xroxbei, naexasisfulde! Japoxan naexasitam wut, Dios kajachawaesaxael xamal chiekal duilaliajwam, asex jiw suapich.

### **Filipos paklowaxpijiw ofrenda xato'apox Pabloliajwa**

**10** Xan nejhachaemlax xamal pejme xan nanejhaxoelam xot, ofrenda naxto'am xotbei xanliajwa. Samata, gracias-an Diosliajwa. Xan tajut chiekal matabijtax, xamal xan nejkiowa-emil. Majt xamal ofrenda naxto'a-emil xanliajwa, ajil xot aton nawexalaeliajwa ofrenda xanliajwa. **11** Xan ampox jumchi-enil

xamal kaes ofrenda naxto'aliajwam. Xan tejew kaeyaxach wut, nakiowa xanejchachaemlax. **12** Xan kijinil wutbej, xan nakiowa nejchachaemlax. Xabich wutbej tejew, xan nejchachaemlax. Litaxaelax wut, nʉafniax wutbej, xan nakiowa nejchachaemlax. **13** Puexa asaxan, pachaema-elpoxan, nawepat wut xanliajwa, xan tajlewla-el japoxanliajwa, Cristo nakajachawaet xot. **14** Xamal isam pachaempox xanliajwa, nakajachawaetam xot nawewe'ppoxanliajwa.

**15** Macedonia tʉajpnʉxot chijian wut tʉadusliajwan naewʉajnalijwan Jesús pejwʉajan Dios asew jiw bu'weliawja, naexasiti Jesús pejwʉajan, xan nakajachawaes-el nawewe'ppoxanliajwa. Jawut xamalkal, Filipos paklowaxpijwam, nakajachawaetam. **16** Majt Tesalónica paklowaxxotx wut, xamal nakajachawaetam pin-iaveces, ofrenda naxto'am wut xan tejew wʉajsliajwan, nawewe'ppoxan. **17** Xan ampox lelʉ wut, lela-enil xamal pejme naxto'aliajwam ofrenda xanliajwa. Xan nejxasinkax Dios nejchachaemlaliajwa xamalliajwa, nakajachawaetam xot. **18** Epafrodito puexa chiekal nachaxdut, xamal naxto'ampi xanliajwa. Samata, amwʉtjel xan xabich tejew. Nawewe'pa-el. Xamal xanliajwa naxto'ampi, ofrenda, japox Diosliajwa, me-ama incienso bowas wut xabejnikaliajwa, ja-aechox. Samata, Dios xabich nejchachaemil, xamal ofrenda naxto'am wut xanliajwa. **19** Samata, Diosbej xamal kajachawaesaxael puexa xamal wewe'ppoxanliajwa. Jesucristo pejjiwam xot, Dios kajachawaesaxael japoxanliajwa, xajʉp xoton japox isliajwa. **20** Puexa xatis pomatkoicha jumchiyaxaes: “Waj-ax Dios xabich pachaem” —chiyaxaes. ¡Jasox nej ja-aeche' Diosliajwa!

**Pablo saludos xato'apox, asew suapich,  
Filipos paklowaxpijwliajwa**

**21** Xan saludos xato'ax asew, xamalxotpiliajwa. Japi Dios pejjiwpi, naexasit xoti Jesús pejwʉajan. Asew, naexasiti Jesús pejwʉajan, xanxotpi, japibej saludos xato'a xamalliajwa. **22** Puexa asewbej, Dios pejjamechan naexasitpi, Roma paklowaxpijw, japibej saludos xato'a xamalliajwa. Roma tʉajpnʉpijw tato'lan, japon pejbaxot nabisti, asew japixot, naexasiti Jesús pejwʉajan. Japibej xabich kaes pejme saludos xato'a puexa xamalliajwa.

**23** Xan wajpaklon Jesucristo kawʉajnax puexa xamal xabich kajachawaesliajwa.